

Bedehusbilete

Eg vaskar hendene
 'Er du vaska i lammets blod?'

Eg vaskar hendene
 ein gong til

Eg er såperein
 Mjølkerein

Kvit bluse i Bibelen

Men blod

Eg faldar hendene
 Bleike og utvaska

Eg faldar hendene
 Under rennande vatn

Alt dette nyvaska håret
 På rad

etter rad
 Og dei rare øyrrene

Alle dei rare øyrrene
 som lyttar

til talaren
 framfor det kvite korset

Eg ser på engelen
 på veggen

Eg ser på fluga
 i vindauga

Eg ser på alt
 som flyg

Her er underleg
 Ei så lys luft

Over eit
 kokande mørker

Lat oss dela verda i to

Lat oss byggja ein vegg
 Her

Og der og der og
 Her

Lat oss laga ei dør
 Slik

At me kan gå inn
 og be

For dei som er utanfor

Fingrane våre møttes
 ved kleshengarane

Brått visste eg
 at du òg bar på ei stor sorg

Inne ved stolrekken
 var det boblante låttar

Stigande låttar
 Gjallande låttar

Eg såg ut vindauge
 På kveldsgatene

Døden sin refleks i glaset

Eg reiste meg og vitna

Eg sa at låtten
 fylte meg med sorg

FRA BOKEN «BEDEHUSBILETE»

FOTO: KNUT BRY

DIKT: HELGE TORVUND

WIGESTRAND FORLAG 2001

